



*Jumat, 10 Mei 2024*

**Ogen: Sepanya 1:7-13**



**NGANDUNG RAS NDERKUH**



Persinget kerna ukumen, erbahan kalak gentar, mbiar tapi man kalak jahat si enggo cinanamen i bas dosa banci lanai bo ia mbiar. Seterusna kenca meritaken ukumen ndai, nggo reh deherna wari e, e maka Sepanya nuriken kai kin kari si jadi i bas ukumen si isehken Dibata man bangsaNa e. Sanga ukumen e jadi maka sora nderkuh ras ngandung ngenca terbegi i tengah - tengah bangsa e. Nderkuh e me kecibal i ja sekalak jelma rusaha ngurangi sui si igejabkenna sanga ia ngenanami kiniseran si mberat. Arah nderkuh ntah pe serko, ndarat ras urak mesui si igejabkenna e. Ngandung pe jadi sada dalam mpedarat racun i bas daging kula si banci erbahanca mesui la saja pusuh tapi pe ukur. Ngandung ras nderkuh jadi sada dalam ncidahkan uga beratna perbeben ras kiniseran si inanamina paksa e. La saja e si jadi, rawa ras pernembah ate Dibata isehkenna man kerina kalak Juda, la erndobahen. Idarami Dibata kerina sabap ipebelin bangsa e kinilapatuhenna alu ngerana maka kai pe labo ibahan Dibata. Tempa-tempa Dibata sinik, la IA mediate nandangi kai si jadi i bas kegeluhen bangsa e.

Terdauhen, si jadi ibahan Dibata lanai saja ia la ngiani rumah siipajekkenna tapi pe lanai ternanamisa kerina si mehuli ras si entabeh. Lanai lit pesta meriah ukur e maka lanai banci iinemna ulih anggur sinisuanna ndube.

Pasti i bas ndalani kegeluhenta pernah nge kita ngandung ntah nderkuh. Paksa si e, urak nge siakap perbeben ras kiniseran si jumpai kita e? Banci jadi. Amin bage gia adi la sidarami mesui ateta, banci labo kita seh ku bas paksa si e ngandung ntah nderkuh. Amin banci saja perbeben ras simesuinta enda erkiteken kalak sideban me sierbahanca. E maka lit singerana la kin pe sidarami, banci nge reh perbeben e ngkenai kita.



Banci nge kita kesehen seh maka nderkuh kita. Amin nderkuh  
pe silebuhlah Dibata nampati kita.